

*Bala* et *Atibala* appellatorum, quæ vates eos docuerat, potestate in itinere non fatigabantur, ac si a matris latere incederent.

10. Per amici patrii, temporum antiquorum gnari, rerum olim gestarum narrationes, quasi curru vectus, *RAGHUIDES* curru adsuetus, cum fratri minore iter pedestre non sentiebat.

11. Lacus supeditabant illis aquam dulcem, aves cantum aures delectantem, venti odoriferum florum pulverem, nubesque umbram suam.

12. Eremitæ non ex aquis lotis splendentibus, neque ex arboribus lassitudinem levantibus, tantam capiebant delectationem, quantam e dulci utriusque juvenis adspectu.

13. *DASARATHIDES*, castigationum sylvam ingressus, arcu instructus, corpore suo pulchro, non vero factis, effigies erat *KÁMADEVÆ*, cujus corpus a *SIVA* combustum erat.

14. Uterque juvenis in via, vastata a *SUKETUIS* filia, cujus imprecationem a *VISVÁMITRA* audiebant, facili opera intendebant arcus, extremis eorum partibus in solum innixis.

15. *TÁDAKA* vero, nervorum sono audito, apparuit, obscuræ noctis colore prædita, pendula crania in auribus gestans, atris nubibus similis, in quibus grues volitant.

16. Vehementi sua celeritate arbores in via concutiens, hominum mortuorum pannis induta, horribiles clamores edens, adorta est *BHARATÆ* fratrem majorem, turbinis instar e cœmeterio orti.

17. *RAGHUIDES* cum conspiceret illam, altero brachio macro erecto irruentem, hominum intestinis in crura dependentibus cinctam, feminam occidendi verecundiam una cum sagitta emisit.

18. Vulnus, quod *RÁMÆ* sagitta inflixit *TÁDAKÆ* pectori, saxi instar duro, morti, nondum in hunc locum aggressæ, aditum ad *Rákshasos* aperuit.

19. Illa, corde sagitta fisso, procidens, non tantum sylvæ suæ solum, sed etiam *RÁVANÆ* felicitatem, trimundii victoria stabilitam, tremere fecit.

20. Noctivaga illa, *RÁMÆ*, tanquam *KÁMADEVÆ* sagitta gravi in corde